



Synfocity = 831

mail us at : mzsynfo@gmail.com; mizoramsynod@gmail.com - Phone - 2314648

March 10, 2022

❑ **Presbyterian Pastor Pension Fellowship (PPPF) General Meeting**

March 4, 2022 khan Presbyterian Pastor Pension Fellowship (PPPF) chuan Annual General Meeting, Synod Office Devotion Room-ah an nei. Meeting-ah hian member 124 atangin member 80 an kal thei a, tun tum hi meeting-ah member an kal that ber tum a ni.

Chawhma inkhawm hi PPPF Chairman Rev. Dr. Lalchhuanliana'n a kaihruai a, Rev. Lairotluanga'n hunserh a hmang. Kum danga an tih thin angin chawhma lamah hian member thar lawmluh bakah Secretary report, Treasurer report leh Audit Report te ngaihthlak a ni a, rorelna neih a ni. PPPF Album leh Directory tlangzarh a ni bawk. Meeting-ah hian member thar mi 14 lawmluh an ni a, Pastor pension thi tawh nupui paruk an tel thei bawk.

Kum 2022-2023 chhunga Office Bearers tur thlanna neih a ni a, hetiang hian chanvo siamrem a ni :

Chairman	Rev. Dr. Zaihmingthanga
Vice Chairman	Rev. C. Rosiama
Secretary	Rev. Dr. H. Vanlalauva
Asst. Secretary	Rev. Dr. Lalchungnunga
Treasurer	Rev. K. Lungmuana
Financial Secretary	Rev. Dr. Lalchhuanliana

Chawhnu inkhawm chu PPPF Vice Chairman Rev. K. Lungmuana a kaihruai a, Rev. Dr. Zaihmingthanga paper buatsaih 'Covid-19 hripui leh Kohhran' tih thupui zirho a ni a, sawihona tha tak an nei.

❑ **Synod Prison Ministry Committee leh I.G. Prisons-te inkawm**

March 7, 2022 khan Synod Prison Ministry Committee chu I.G. Prisons Office-ah lengin inkawmhona hun tha tak an nei. Synod Prison Ministry Committee-te hi Rev. Dr. K. Lallawmzuala, Executive Secretary i/c Prison Ministry leh Rev. Lalmuchhuaka, Director hovin an kal a, Pi Zarzokimi, I.G. Prisons leh Pi Jennifer Chongthu, Superintendent, Prisons-in an lo dawngsawng a ni.

He hunah hian jail chu misual hremna hmun ni lovin, an lo chhuah leh hunah pawh an khua leh vengte tana khua leh tui tha, an lawina Kohhrana mi hman tlak an nih theihna turin; tisa leh thlarau lamah enkawl puitlina, chher chhuahna hmun Correction Centre a nih zawkzia te, a hlawhtlin theihna turin kut themthiamna lam thil (Vocational Training) tih theih leh remchang apiang an tih theihna tura Training Centre din sak a tul thu leh hmalak dan tur te, Kohhran leh khawtlangin jail tangte hi en tleu mai lovin, nun kawng dik leh tha an zawh hlen ve theih tawhna tura kan mawhphurhna inzirtir nasat leh zual tul an tih thu te, Sawrkar leh kohhran mawhphurhna leh tih tur nia an hriatte sawi hovin, hmalak zel dan tur leh kut intihchaksak tawn dan tur tha an tih te inpawh takin an sawi ho a, Rev. H. Laltlanthanga, Armed Veng Bialtu Pastor-in tawngtaiin a tin a ni.

Synod Prison Ministry Committee chuan hun tha tak siama inlenga sawmtu Pi Zarzokimi, I.G. Prisons leh Pi Jennifer Chongthu, Superintendent chungah lawmthu an sawi.

❑ **Counselling Training wawi 33-na kharna neih a ni**

Mizoram Synod hnuaiia Family Guidance & Counselling Centre (FG&CC)-in Kohhran hruaitute puala February 24, 2022 atanga Synod Conference Centre-a 'Church Leaders' Intensive Residential Pastoral Care & Counselling Training' wawi 33-na a buatsaih chu March 7, 2022 zan khan 'Final Evaluation & Graduation Service' nein khar a ni.

Training kharna hun hi Rev. Lalsangbera, FG&CC Director-in a kaihruai a, Rev. Dr. Vanlalnghaka Ralte, Synod Moderator-in training chhuakte hnenah Certificate semin thuchah a sawi. He Counselling Training-ah hian Aizawl khawpui chhunga Pastor Bial 9 atangin Kohhran aiawh 21 an tel a ni.

Training kharna inkhawmah hian Training chhuakte chuan an hlawkpui dan a lema an ziak chu entirin an hrihlfiah a, Upa F. Vanlalbuanga, Bethlehem Venglai North chuan training chhuakte aiawhin thu a sawi a, Upa Andrew Lallerliana, Com. Member, FG&CC chuan Training chhuakte a tawngtaisak a ni.

Thuchah sawitu, Synod Moderator Rev. Dr. Vanlalnghaka Ralte chuan "Counselling hi mi tin mamawh

a ni a, Mizoramah pawh a pawimawhna kan hre chho ta zel a, a lawmawm hle. Counselling hi Lal Isua hna kan thawhpaina pawimawh tak a ni a, kan ramah harsatna tawh mi tam tak an awm a, an la awm zel dawn bawh a ni. Hemi vang hian Synod pawhin a ngai pawimawh a, Counselling lam zirna sang zawh pawh a siam belh zel a ni." a ti a. Training chhuak tharte chu an thil zirte midang tana tangkai taka hmang zui turin a fuih a ni.

FG&CC hian Pastoral Care & Counselling Training hi Pastor-te pualin vawi 28 buatsaih tawhin, Pastor 479 training a neihpui tawh a. Church Leader-te puala kum 2002 atanga training vawi 33 a neihpui tawhah Kohhran hruaitu 690 Training pek an ni tawh bawh a ni.

Synod hian Counselling Centre pakua - Mission Veng, Bawngkawn, Vaivakawn, Champhai, Serchhip, Kolasib, Lunglei, Mamit leh Khawzawlah te a nei a. Heng Counselling Centre pakuaah hian tun thlenga pantu (Client) an neih tawh zat chu mi 42,804 an ni.

□ **Synod Music School : Bawngkawn hawn a ni**

March 8, 2022 chawhnu dar 2 khan Synod Worship Committee chuan zirna kalpui leh theih huna hman nghal turin Synod Music School, Bawngkawn Kohhran Hall-ah an hawng.

Synod Music School hawna inkhawm hi Rev. Dr. K. Lallawmzuala, Executive Secretary i/c Worship-in a kaihruai a. Rev. Dr. Vanlalngbaka Ralte, Synod Moderator-in thuchah sawiin Music School hi a hawng a. Upa H. Lalhmingmawia, Co-ordinator, Worship chuan report pein "Synod Music School Branch an hawn chu kum 2019 Synod rorel bawhzuina a nih thu leh Class tan a nih theih hunah zing karah Tonic Solfa leh Staff Notation zirtir tum a nih thu" a sawi a. "Class hi Bawngkawn Kohhran Hall-ah neih a nih tur thu leh Synod Music Instructor-ten an zirtir thin tur thu" a sawi bawh.

Synod Moderator, Rev. Dr. Vanlalngbaka Ralte chuan, "Synod rorelnain Music lama hmasawna tur a rel hi a lawmawm a. Kristian Hlabu leh Naupang Hlabu ennawn hna pawh a bul tan hnaih a ni ta hi a lawmawm hle. Khawvelin Mizote min hmehhriat dan chu zai a nih avangin Tonic leh staff notation thiam chu a pawimawh a, a tangkai em em a ni" tih a sawi.

Music School hawna inkhawmah hian Rev. K. Lalrinmawia, Bawngkawn Bialtu Pastor leh Bawngkawn Kohhran Chairman ni bawh pawhin thu sawiin, Tv. Victor Lalbiaktluanga, Bawngkawn-in Pathian fakna hla a sa a ni.

Synod Worship Committee-in Bawngkawn-a Synod Music School a hawnah hian zing dar 6:30-7:30 chhungin class neih thin a ni ang a. Zir tan theih hun tur sawi lawk theih loh mahse, zir dil duhte tan tunah hian dil theih a ni a. March ni 30, 2022 thleng hun hawn a nih thu Synod Worship hruaitute chuan an sawi. Synod Music School-a Tonic Solfa leh Staff Notation Intermediate Course hi thla thum chhung zir tura tih a ni.

He School hawnaah hian Synod Worship Executive Committee te, Synod Music Instructor te, Bawngkawn Kohhran Committee te, Aizawl Hmar Presbytery Puipate, Bawngkawn Bial Standing Committee te, Bawngkawn Branch K.T.P. Office Bearer te leh Bawngkawn Kohhran Hmeichhia leh Bawngkawn Kohhran Pavalai Pawl Chairman & Secretary te ve ve an tel a ni.

□ **Chanchin Tha Thlen Ni**

March 15, 2022 (Thawhlehi) hi Mizorama Chanchin Tha thlen Ni champha a ni. Hemi ni pual hian zan inkhawm programme siam a ni a, thupui inang tlang zir tura tih a ni. Nilenga hmang thei Kohhran tan pawh mahni Kohhran remchan anga ruahman mai tur a ni.

Zan inkhawm thupui : "Chanchin Tha - Malsawmna thlentu",

Matthaia 6:31-34; Johana 1:47-51; Ephesi 1:18-23

Chanchin Tha Thlen Ni atan hian kum 2014 hma lamah chuan Rev. J.H. Lorrain (Pu Buanga) leh Rev. F.W. Savidge (Sâp Upa) ten Mizoram an lo luh ni, January 11 hman thin a ni a. Kum 2012 Synod Inkhawmpui chuan Rev. William Williams-a'n Mizoram a lo luh ni, March ni 15, 1891 chu Mizorama Chanchin Tha lo thlen ni atan a pawm a ni.

Rev. William Williams hi Khasi rama Welsh missionary a ni a, Mizote chanchin a hriatin Mizote zinga Chanchin Tha hril a duh hle a, Mizote zingah missionary ni tura a lo kal thei lo chungin Mizoram tlawh hram a tum a, Silchar D.C remruatpuinain Sipaiho ruala lo kalin Mizoram a rawn lut a, a hmasa ber atan Mizote zingah Krista Chanchin Tha a rawn puang ta a. Synod 2012-in a rel angin Rev. William Williams-a'n Mizoram a rawn thlen ni (March 15) hi Mizoram Presbyterian Kohhran te chuan Mizorama Chanchin Tha lo thlen ni atan kum 2014 atangin a hmang ta a ni.

- ❑ **Synod Mission Board leh ram pawn chet velna**

 - ♦ **Jharkhand Mission Field**

February 28, 2022 khan Kalidaspur Fellowship-ah ringthar panga (puitling 4, naupang 1)-in Bialtu Pastor Rev. C. Lalnuntluanga kutah Lal Isua zui turin an inpe.

March 6, 2022 khan Sikaripara Preaching Station-ah ringthar puitling pakhatin Bialtu Pastor Rev. Mungsi Hembrom kutah Lal Isua zui turin an inpe. Bhawani Preaching Station-ah ringthar 8 (puitling 4 leh naupang 4) in Bialtu Pastor Rev. C. Thangromawia kutah Lal Isua zui turin an inpe. Church of North India (CNI) Kohhran atangin puitling pahnih kan Kohhranah an lo pakai bawk.
 - ♦ **Tripura Mission Field**

March 6, 2022 khan Mowb-II Kohhran, Itanagar Bialah ringthar pakhatin Bialtu Pastor K.Zoremthanga kutah Lal Isua zui turin an inpe.
 - ♦ **Assam Mission Field**

March 6, 2022 khan Beltola Fellowship-ah Assamese chhungkaw pakhat member 3 (pathum) in bialtu Pastor Joseph Lalnunmawia kutah Lal Isua zui turin an inpe.

Balemu Fellowship-ah Ringthar hmeichhia Puitling 1(pakhat) in bialtu Pastor F.K. Hlunchhunga kutah Lal Isua zui turin an inpe.
 - ♦ **Karbi Mission Field**

March 6, 2022 khan Zion Kohhran (Dongka Bialah) chhungkaw 1, member 4 te Pastor C. Lalbuatsaiha kutah Lal Isua zui turin an inpe.

Oklangchar Kohhran (Silonijan Bialah) Pastor Lalrokima kutah Lal Isua zui turin an inpe.
- ❑ **Synod Relief Fund**

Tun hnaia harsatna hrang hrang nei chhungkaw 8 te hnenah Synod Relief Fund atangin chhawmdawlina Rs. 64,000/-pek an ni.
- ❑ **Synod Prison Ministry**

March 9 – 13, 2022 chhung hian Rev. Lalhmuchhuaka, Synod Prison Ministry Director leh Pu Lalduhawma Chhangte, Synod Prison Ministry Counsellor-te Mamit leh Kolasib-a District Jail-te tlawhin District hruaitute nen inkawmna hun an hmang ang.
- ❑ **Worship**

March 8- 11, 2022 chhung khan Khawbel Kohhranah Solfa, Zai hruai leh Conducting Training neih a ni a, training hi Pu H. Lalrinmawia, Senior Music Instructor leh Rorelkima ten an neihpui a ni.
- ❑ **MSSU**

March 11- 13, 2022 hian Khawhai South Bial huapin Sunday School Zirtirtu Training, Khawhai South Kohhranah neih a ni dawn a, training hi Pu H.K. Hmingthanzuala, Asst. Coordinator; Upa Hrilthansanga, MSSU Trainer leh Upa K. Vanlalnghaka, MSSU Trainer ten an neihpui ang.
- ❑ **Kohhran Hmeichhia**

 - ♦ March 11, 2022 (Zirtawpni) hian Electric Veng Pastor Bial Kohhran Hmeichhe Silver Jubilee hmanpui turin Central Kohhran Hmeichhe hruaitu – Pi Lalrinliani, Treasurer; Pi Zochungnungi, Committee Member; Pi Lalthakimi, Committee Member; Pi C. Thanpari, Committee Member leh Pi Laldingliani, Committee Member te an kal ang.
 - ♦ March 11 – 13, 2022 chhung hian Hnahlan Pastor Bial Kohhran Hmeichhe Inkhawmpui leh Golden Jubilee hmanpui turin Central Kohhran Hmeichhe hruaitu – Pi Sailuti, Chairman; Pi R. Lalengmawii, Committee Member; Pi Lalramzauvi, Committee Member leh Pi Lawmkimi, Committee Member te an kal ang.
- ❑ **Kristian Thalai Pawl**

March 11 – 13, 2022 hian Central Tripura Presbyterian Youth Fellowship General Conference Vawi 22-na, Tuidu Kohhranah neih a ni dawn a, Central KTP hruaitu - Upa Lalrinmawia Ralte, Fin. Secretary leh T.Upa H.Lalrosanga, Committee Member-te an kal ang.
- ❑ **Synod Social Front**

March 11 – 13, 2022 chhung hian Moral Reform Seminar leh Social Front Campaign, East Lungdar leh Sailulak Kohhranah neih a ni dawn a, hemi neihpui tur hian Rev. Dr. Lawmsanga, Upa Dr. Lalrintluanga leh Rev. Lalrinmawia te an kal ang.

- ❑ **Hruaina Eng FM Radio :**
MARCH 11, 2022 (Zirtawpni) (FM Zoawi - Aizawl & Lunglei @ 7:30 p.m.):
Solo : Ruth Lalbiaknii- A va hlu em, *Zaipawl* : Kahrawt Pastor Bial Zaipawl-Chanchintha, *Thusawi* : Rev Lalchhuanmawia-Chanchintha hril kohhran hnapiui, *Solo* : Jennifer Lalremruati- Chanchintha mitin tan, *Zaipawl* : Bungkawn Vengthar Kohhran Zaipawl- Lalpa tlangah
- ❑ **Susamachar Prasaran Programme :**
MARCH 13, 2022 (Pathianni) 5:00 pm. :
Group/Choir/Solo : Siyon Swaram - Tere Charno, *Group/Choir/Solo* : Sihphir Bial - Me Akhen Apni
Sermon : Zohmingthanga - Yesu Sabka Sahara, *Group/Choir/Solo* : Bungkawn Vengthar - Siyon Desh, *Group/Choir/Solo* : Venghnuai Kohhran - Ham Syon Ka
- ❑ **Moderator leh Executive Secretary-te Programme:**
Rev. Dr. Vanlalngbaka Ralte : Moderator
March 13, 2022 (Zan) Armed Veng Kohhran tlawh
Rev. C. Zoramawia : Senior Executive Secretary
March ni 19 – 22 Manipur Area tlawh
Rev. V.L. Luaia Hranleh : Executive Secretary
March 11 & 12, 2022 Biak In hawn & Jubilee lawm - East Lungdar Venghlun
March ni 18 Synod Service Board Committee
Rev. Dr. K. Lallawmzuala : Executive Secretary
March 11, 2022 Partnership Committee
March 20, 2022 Moral Reform Seminar, Muallungthu Bial

SYNOD MUSIC SCHOOL ADMISSION CHUNGCHANG

A hnuai tarlan ang hian Synod Music School Mission Veng leh Bawngkawn-ah **Tonic Solfa & Staff Notation Intermediate Course** zing **6:30 - 7:30** chhunga zir duhte tan dil theih a ni a. Dil duhte chuan a hnuai tarlante hi hriat nise :-

1. Worship Department, Synod Office atangin dilna form la chhuakin **March 30, 2022 (4:00 pm)** ral hma ngeiin Synod Office-ah thehluh tur a ni.
2. Zirna In hawn a nih hunah class tan tur a ni ang.
3. Dilna-ah mahni awmna Kohhran lehkhah thil tel tur a ni.
4. Hriat tur tul dang chu dilna Form-ah tarlan a ni. Dilna form leh hriat tur tul dang hi Synod Website, www.mizoramsynod.org a duhte tan download mai theih a ni e.

REV. Dr. K. LALLAWMZUALA
Executive Secretary
i/c Worship

D.Th. ZIR TUR ZAWNNA

Mizoram Synod Theological Education Board chuan a hnuai Department tarlanah te hian kum 2023-2024 Session atanga D.Th. zir tur dilna a hawng a. Synod mi rawih laite zinga dil duhte chuan **April 8, 2022 (Zirtawpni)** aia tlai lovah a hnuai hming ziak hnenah dilna theh luhtur a ni. Diltute chuan Theological Education Marksheet leh Medical Certificate thil tel tur a ni ang.

1. New Testament
2. Christian Theology
3. Missiology
4. Religion

REV. DR. TLANGHMINGTHANGA
Secretary
Synod Theological Education Board